

Kerwerede 2020

Vorgetragen von Jannis Schneider

Verfasst: Nino Piazza

Ehr Leit, die Kerweredd iss gerett,
drauße fällt des Fesched aus, dess is nett nett,
ich häb des Johr koa onneri Wahl,
unn trogs se vor holt digital!
Deshalb aach, ess iss nett verhext,
in Anbetracht der Sache etwas verkerzt!

Besondere Umständ, erfordere beileibe,
onnern Iwwertrogungsmöglichkeit.
Noch moim Vorgänger Leon, dem ich herzlich donke,
häwwe mer jetzt eh nei Konstellation, jedoch mit Schronke.
Sou pärsentiert sich des Johr im Ausnahmezustand,
nur der Kerweborsch unn die Kenischin, jedoch gonz ganlant!

Sou stät vor eich, dess erstmalisch in der Hoambecher Kerwegeschicht,
eh Zwillingspärche eich zu Geschicht.

Des gät oi in die Anale, einmalisch und des kon koans bezahle!

Ich stelle vor, im Jahr Zwodausendzwazisch,
eh junges Ding, fit unn nett ranzisch,
blühend, im Gardedonz du se die Boa houchhebe,
ja, des mist ehr mol erlebe,
Fassebutz unn vieles meer,
ja, moi Schwester gibt veel heer.

Ferner desss is a noch drin, iss sie gern Longschläferin.

Ich bin stolz sie vorzustellen,
moi lieb Schwesterherz, ich stell se vor bei leibe,
niemand onnerscht, wie die bildhübsch Ricarda Schneider!

Prost!

Musik!

Ricarda:

Sou, jetzt därf ich aach wos soache,
ich kenn en schon seit ewische Doage,
meer worn schon zusomme, kimmt meer in de Sinn,
als meer bei de Ute, unser Mutter im Bauch schon rinn.

So kann ich soage gonz beilebe,
meer sin des Kerwepaar seit ewische Zeite!
De Jannis moin Bruder, der Monn vun Welt,
wor schon vor 17 Jahr for die Kerwe bestellt,
der stellt sich in die Tradition ehnoi,
sou muss es bei de Staffas soi!

Ich bin froh, dass er de Kerweborsch präsentiert,
unn er uff moi Komando pariert.

Er macht sou Sach bestimmt gonz gut,
ich bin do wirklich vollem Mut,
der nei Kerweborsch, ich konnst kaume beschreibe,
iss moin Bruder der Jannis Schneider!

Prost!

Musik

Jetzt kennt ehr uns, unn wisst meer sin,
sou fonge meer ou mit unserm Klimbim,
denn ach in dene Kontaktverbote,
gibt es lustische Anekdoten!

Jetzt glei mol wos, des fraat mich aa,
ebbes zu verzeile, vim jährliche Tagesausflug fum DRK!
Unser Hoambecher DRK, Verband vun Welt,
hot wie jedes Johr en Bus bestellt,
die letschdjährisch Tüür hot insgesamt gut geklappt,
es ging noch Worms in die Niebelungenstadt!
Do gibt's jo allerhond zu säi,
die Stadt, die Kersch, blous koan Wold und aach koa Räi!
Jetzt kimmts:
Bei sou veel Besichtigunge, dess iss donn aach koa Wunner,
iss es drei ehrjafte Doame fum DRK iwverkumme,
unn musste mol, do hilft koa fluche,
dringend die Örtlichkeit uffsuche!
Gesoacht, getan, gesucht unn gefunne,
in e Wormser Boank, häwwwe se Erleichterung gefunne!
Des Dreigestirn und Geleit, wor donn frehlich unn befreit!
Doch korz denoch, wos en Graus,
sah die Welt gonz onnerschd aus.
Ich verzeil eich jetzt koan Schmarn,
in de Bonk, do gabs en Bombealarm.
Die Polizei gesperrt, koaner mer roi noch raus,
die 3 Hoambecher worn zum Glick schun draus!
Kam der Alarm vun de Schaltherhall orrer dem Kabinett,
ich muss eich sogage, des waas ich nett.
Vor mich stellt sich die Erkenntniss oi,
des konnte die 3 Doame aus der Örtlichkeit nett gewäse soi.
Denn do braischt meer noch veel mäi Energie,
soi wie bei meer, gäb meer en Woi, die gut Brie! Prost!

Wundersame Ereignisse, die Geschichte iss gonz nett,
ereignete sich bei de Staffas-Hedi, moi Groumodder aus de Wasserschepp!
Regelmäsisch und zeidisch stäin bei ehr die Milltonne gont bestimmt,
bevor die Millabfuhr oufährt un den Dreck mitnimmt!
Doch irgendwie, meer kann sich des Wunder nett erklärn,
do kame die fleisische Abfallherrn,
häwwwe die Mülltonn ordnungsgemäß oigehängt,
unn Richtung „Abloade“ nuff gelenkt.
Doch dessmol, meer konns kaum beschreibe, es iss keck,
ging nett nur der Inholt vun de Tonn in de Sammeldreck!
Sondern aach die Milltonn mit Inhalt gonz galant,
iss in de Container donn geloand.
Longe Rede, kurzer Sinn,
aach die Milltonn wor jetzt in dem LKW mit drin.
Die Hedi hott sich gewunnert, on dem heilische Ort,
denn ehr Milltonn wor jetzt pletzlich fort!

Die Erkenntnis stellt sich oi,
wenn du monsch gonz laut,
deer hede onnern Leit die Milltonn geklaut,
donn frog erschd mol den ZAKB gonz unbenumme,
vielleicht häwwwe die se bei der Entsorgung glei mitgenumme!

Bin ich frou, moin Woi iss noch do,
nett entsorgt orrer onnerschdwou!
Ja, Glick muss meer hou, weil Glick nix koscht,
unn ich entsorg moin Woi onnerschd – Prost!

Ehr Leit,
als kloane Bu, ich kann mich noch entsinne,

duschk du deer veel oabgewinne,
hoscht du katt mol e Problem, orrer du worschk iwwerzwersch,
hots hehaase, gäi bede zum Herrgott unn gäi in die Kärsch!
Donn gäist der besser, des iss koan Graus,
du gäischd hinnerheer frehlich aus de Kersch werrer raus!
Dieses Gesetz gilt jedoch nur for die Menscheit,
ich soags frei raus.

Bei de Tiern, vor allem des Behzeig, sieht des onnerschkd aus.

Sou wors aach bei unserem Hochwürden Pfarrer Röhr,
des iss nett falsch zu verstäi,
vor e kloani Wildsau vor der Lärsch nett schäi.

Die Wildsau halb Frischling, halb Sau, es wor draus kühl,
in die Kersch noi, um zu erbitte Asyl.

Unsern Parrer unn die Fraa Ballweg erkannte die Lage,
nahme Kehrbesen und Rechen ohne Frage,
unn häwwe mit veel Uffwond, bisa se worn zufridde,
die Wildsau vun der Kerch vertriebbe!

Wos iss die Welt doch sou verkehrt,
der Wildsau wurd Asyl verwehrt.

Denkt mol, uff der Arche Noah, wor aach Veehzeig, des is bekannt,
die durfte all ins gelobte Land.

Aach in Betlehem im Stall,
wor Ochs und Esel debei uff jeden Fall.

Die Erkenntnis stellt sich oi, ich unnerschreibs gonz fett,
in Sankt Michael gäit des nett.

Wendschend kimmt der Messwoi in die Kersch enoi,
lobet den Herrn, un der Woi, muss bei meer noi!

Prost!

Musik

Schluss:

Die Kerwe fällt nett komplett aus,

meer feiern äwe holt zuhaus,

hollt eich e Flasch Woi aus em Keller,

donn vertreibt ehr eiern Kummer schneller!

Negschd Johr sinn meer wärrer parat,

do wird gefeiert unn net gespart!

Ferner will ich donke, unbelesse

ich werr des nie vergesse,

denne donke zu soage,

die die Kerwe finanziell mitroche!

Seie es Tasse, Unikate, orrer Woi,

mit Etikettedruck wie iss dess foi,

aus der Geschäftswelt, ja meer brauche die,

die uns unnerstitze, sou gut wie nie!

Nur sou gäits weirer, klipp unn klar, donn iss die Kerwe nexschdt Johr werrer da.

Nochmolas Donke ehr liewe Leit,

die uns unnerstitze zu derer Zeit!

Sou häwwe meer die Möglichkeite,

die Kerb zu feiern alle Zeite!

For uns, for eich, meer meer bleibe debei,

mache uns vun de Bazille rischdisch frei!

Donn sähn, meer uns wärrer, ich soags beileibe,

ich konns kaum erwarte - euern Kerweborsch Jannis Schneider!

Ricarda:

Unn for eich iss uff jeden Fall immer da, meer hoffe des beschde
eier Kerwekönischin, die Ricarda, die erschde!!

Beide:

Wem iss die Kerwe?

Unser!